

Ekigambo ekirusoborra eby'okuhabura kuruga hali
Agwera Omuhandiiki Mukuru w'eby'okukoonyera Abantu
Omu. Sergio Viera de Mello.

Abantu abaha obukoonyezi beeyongire kugenda nibeetegereza ekizibu ekiroho eky'abantu abahanganguka kuruga omu bicweka byabu, hati abarukukira omu bukaikuru 20 omu nsi yoona. Noobu kiraaba kiri ngu muno muno buli bujunaanizibwa bwa gavumenti z'amahanga hali ekizibu eki kiba rundi gavumenti z'ebicweka hali abantu abo bali kulinda kurungi Abahanganguki, kiri kintu kikuru amahanga goona kurora ngu nigakora ekirusoboka kukoonyera ha kulinda abantu Abahanganguki habw'obulemu n'akanenangaine akali omu ihanga eri. Nituteekwa kuha obukoonyezi omu mulingo oguraayongeraho kutangira Abahanganguki kuhikwaho akabi.

Omu mikorre y'Ekitebe ky'Amahanga Ageeteraine (UNO), bingi ebikozerwe kurora ngu nihabaho okwirukirra omu bwangu ha byetaago by'Abahanganguki. Orukurato orurukumanywa nka "The Intergency Standing Committee" (IASC) rumpaire obujunaanizibwa bw'okuhikirwaho ha nsonga ezikwasire h'Abahanganguki omu kutunga obukoonyezi kuruga omu Mahanga Ageeteraine. Obu ndukukora omulimo gunu ogumpairwe ninyeeherayo kimu kwongera amaani omu Kitebe ky'Amahanga Ageeteraine nukwo kisobole kwirukirra Abahanganguki, kuhikirra bwangu ebitongole byona ebirukukwatwaho hamu n'okubagana obujunaanizibwa obu otiireho n'okuha obusagiki ebitongole by'ekitebe kinu ebirukukora omulimo gunu.

Nahabweki ninsiima engabwa y'omuhandiiki omukuru habw'okuturukya ebihandiiko eby'okuhabura ha buhanganguki. Eby'okuhabura binu nibisigikira ha kiragiyo ky'obukoonyezi ha bantu omu nsi yoona, na ha biragiyo ebhairwe ha bugabe bw'abantu ebiraakora nk'eky'okuhondera omu nsi yoona, kuhabura gavumenti zoona hamu n'ebitebe ebiha obukoonyezi n'ebikoonyera omu nkuraakurana nukwo bisobole kulinda kurungi Abahanganguki n'okubaha obukoonyezi.

Orukurato rwa IASC nirusagikira kimu eby'okuhabura binu kandi nirutamu amaani abakurasi baarwo babihanuuleho n'abakuru baabu hamu n'abantu aba barukukora nabo, na muno abo abarukukorra omu bicweka hali Abahanganguki bali. Kinu nikijja

kubasobozesa kurora ngu bahondiire eby'okuhabura ebi omu ibara ly'Abahanganguki boona.

Nyina okunihira ngu eby'okuhondera binu nibisobora kukora kikooto omu kuleetaho okumanyisa abantu ebyetaago by'Abahanganguki, kandi n'okukoonyera ha kutunga obusagiki kuruga omu bantu abaha obukoonyezi. Nibijja n'okukoonyera abakozi abali omu biikaro ebirumu Abahanganguki kutunga eky'okuroraho obu baraahikwahoga ekyetaago ky'okulinda Abahanganguki n'okubaha obukoonyezi. Ha murundi nugwo gumu, eby'okuhabura binu nibijja kukoonyera gavumenti omu kutaho eby'okwerinda ebihikire n'okurora ngu Abahanganguki nibaikara kurungi.

Nyina okunihira ngu buli omu hali inywe najja kukora n'amaani kurora ngu ebigambo by'okuhabura binu bisaasaniziibwe hoona hoona kandi bitirwe omu nkora nukwo kiimukye omutindo gw'Abahanganguki kandi barabibwe kurungi nkooku kirukwetaagisa.

Ekigambo eky'okwanjura
kuruga hali engabwa y'omuhandiiki Mukuru
ow'eby'Abahanganguki.
Omu. Francis M. Deng

Abantu omu nsi yoonna bahikirweho ekikangabwa ky'okurora ngu abantu abarugire omu maka gaaabu habw'ebizibu nk'eby'obulemu, kutaahirra obugabe bwabu ekihinguraine n'ebintu ebindi ebibuzaaho abantu obusinge kyonka baikara omu mitaano y'ihanga lyabu balinzirwe kurungi. Abantu banu emirundi ekira obwingi baba n'amaseege g'amaani, babonabonesibwa kandi bakira n'okusoroorwa. Eby'okuhabura binu ha buhanganguki bikakorwa nukwo ekizibu kinu kisobole kuhwaho.

Eby'okuhabura binu nibyoleka obuganbe n'ebihikiriire ha Bahanganguki omu miringo yoonna ei barukwirukibwa omu bicweka byabu, nibiiteekaho emiringo y'okubalindamu kandi n'obukoonyezi omu kasumi baba bali omu buhanganguki. Nibiteekaho emikorre y'okubasobozesa kugaruka kurungi omu maka gaabu bakateekana omu biikaro byabu kandi baakeetaba omu bantu ba bulikiro buhyaka. Noobu kiraaba kiri ngu tibiina obusobozi oburukuhambiriza buli muntu kubihondera, bikozerwe nibihondera ekiragiyo ky'obugabe bw'abantu omu nsi yoonna hamu n'eki ekikora ha kuha abantu obukoonyezi otiireho n'eki ekikwasire ha busuuhuuki.

Eby'okuhabura binu bikozerweho kumara emyaka nyingi kurugira kimu 1992 Ekitebe ky'Obugabe bw'Abantu (Commission on Human Rights) obu kyampaire obusobozi obu, kandi byagenda nibitereekerezebwaga kusigikira ha bihanuuro ebirabibwaho ekitebe eki n'enkurato z'abakurasi boona. Ha kutandika nyowe nkusabwa kubanza kwetegereza ensonga ezireetaho obuhanganguki kandi na biki ebihonderaho obu hamara kubaho obuhanganguki. Nkasabwa n'okwetegereza ngu Abahanganguki baina kiikaro ki omu kiragiyo ky'ensi yoonna, kandi nibakoonyerwa bata omu byetaago byabu, kandi nasabwa n'okutunga emihanda y'okubalinda kurungi n'okubitungira obukoonyezi.

Nahabweki, kuhandiika ekihandiiko kinu kikaba nikyetaagisa kuhondera ebiragiyo n'emikorre etiirweho habw'Abahanganguki n'okubungira amahanga gatali gamu

n'okwekaguza haali gavumenti zaago ebiraakoonyera Abahanganguki. Gunu nugwo gubaire mulimo gwange ogukuru muno. Kuraba omu kukoragana hamu n'abanyabiragiho omu nsi yoona kimpaire omugisa okwetegereza Abahanganguki abali omu mahanga g'owaabu nkooku babazibwaho ekirukumara omu mahurre.

Kinu kimpaire omugisa kuturukya ekihandiiko ekirumu ebiragiho eki nyesire "Compilation and Analysis of Legal Norms" (E/CN.4/1996/52/Add.2). Okuseruuliriza kunu nikwoleka ngu noobu kiraaba kiri ngu ebiragiho ebiroho nibikiriza Abahanganguki kubazibwaho ekirukumara omu mahurre, haroho kikooto ekirukuburamu omu biragiho binu ha kulinda kurungi Abahanganguki banu n'okubitungira obukoonyezi. Nahabweki ekitebe ky'obugabe bw'abantu n'orukurato rw'abakurasi boona bakansaba nteho emikorre eraakonyera Abahanganguki omu nsi yoona. Nikyo mpikiire ha kuturukya ekihandiiko ky'eby'okuhabura kinu nikyoleka biki ebiroho hati kandi biraha ebirukuburamu.

Obu namazire kuhayo eby'okuhabura binu omu Kitebe ky'Obugabe bw'Abantu omu 1998, ekitebe kikakora encwamu nikihondera eby'okuhabura binu kandi nikihondera na nyowe nyenka nk'Omukurasi w'Omuhandiiki Omukuru nkooku nkaba nyolekere ngu nibyo ndukugya kukozeza omu kuhanuura na gavumenti z'amahanga n'abantu boona abali omu mirimo ekwasire ha Bahanganguki. Ekitebe ky'obugabe bw'abantu kikongera kyarora ebiri omu rukurato rwa IASC orukaba rusiimire eby'okuhabura binu kandi rutiiremu amaani abakurasi baarwo kubihanuuraho n'abakuru baabu n'abantu boona abarukukora omu Bahanganguki kandi n'okubikozesa omu mirimo yaabu omu ibara ly'Abahanganguki.

Eby'okuhabura binu nibiija kukoonyera muno gavumenti, abantu boona abarukukwatwaho, ebitebe ebikoragana na Gavumenti z'amahanga hamu n'ebitebe ebitali bya gavumenti omu mirimo yabyo ekwasire ha Bahanganguki. Nyina okunihira ngu nibiija kusaasaanizibwa haingi haingi kandi bikozezebwe nkooku kirukwetagisa.

EBY'OKUHABURA HA BUHANGANGUKI

ENTANDIKO - HALI BIRUKUKANGA N'OMUGASO GWABYO

1. Eby'okuhabura binu nibikwata ha byetaago by'Abahanganguki omu nsi yoona. Nibyoleka obugabe n'ebintu ebisemeriire habw'okulinda abantu abahambirizibwa kugya omu buhanganguki, otiireho n'okubaha obulinzi n'obukoonyezi obu baba bali omu buhanganguki n'obu bagaruka omu maka gaabu rundi bakafururwa kugarurwa omu biikaro ebindi n'okugaruka kwetaba omu bantu ba buliijo buhyaka.

2. Okusoborra amakuru

Habw'ekihandiiko ky'okuhabura kinu, Abahanganguki nubo abantu rundi ebitebe by'abantu abahambirizibwa kwiruka kuruga omu maka gaabu rundi omu biikaro hali basangirwe nibaraara, na muno kinu obu kireetwaho obulemu rundi bakairuka obulemu rundi nibatiina obulemeezi oburugirra omu bulemu, rundi enyikara ezirukweraliikiriza rundi okurubatirra obugabe bwabu rundi obu habaho akanyamulyaine koona akaleeserweho abantu. Abahanganguki baina kuba abantu abatakatambukire omutaano gw'ihanga gwona ogurukumanywa, bali omu ihanga lyabu.

3. Eby'okuhabura binu nibiikiraniza n'ekiragiyo ky'ensi yoona eky'obugabe bw'abantu. Nibihabura banu:
 - a) Omukurasi w'Omuhandiiki Omukuru ow'eby'Obuhanganguki omu kukora omulimo gwe.
 - b) Gavumenti z'amahanga obu zeasanga omu kizibu ky'obuhanganguki
 - c) Abantu boona abarukukwatwaho, ebitebe by'abantu n'abantu boona omu nkoragana yaabu n'Abahanganguki.
 - d) Ebitebe ebikoragana na gavumenti ezitali zimu otiireho n'ebitebe ebitali bya gavumenti omu kukora ha bizibu by'Abahanganguki.
4. Eby'okuhabura binu nibiteekwa kumanyisibwa abantu baingi kandi bikozezebwe hoona hoona.

**EKICWEKA KYA I: EBW'OKUHABURA BYONA OKUTWARRA
HAMU**

- Eky'okuhabura 1

1. Abahanganguki nibajjaga kuba n'obugabe oburukwinganira kimu n'obw'abantu boona abasigaireho omu ihanga lyabu. Tibajjaga kusoorwa omu kwegondeza omu bugabe bwabu ngu habwokuba bo bali Bahanganguki.
2. Ebiragiho binu bikwasire ha kiragiho ky'ensi yona kandi tibirukusoorwa ha muntu ali nkozi y'ebibi, na muno nk'okuhwerekereza abantu rundi asobiize abantu ekintu ky'amaani rundi aleesere obulemu omu kicweka kye.

- Eky'okuhabura 2

1. Ebiragiho binu nibijja kuhonderwa abarukukwatwaho boona, ebitebe by'abantu n'abantu kwonka hataroho kwahukana kw'amaani gonze ebiragiho byabu noobu biraabaga nibyahukana. Kuhondera ebiragiho binu tikijja kutaahirra ebiragiho ebirukulema abantu abarukwahukana rundi ebitebe by'abantu abarukwahukana.
2. Eby'okuhabura binu tibijja kutwarwa nk'ebirukubundiika ebiragiho by'obugabe bw'abantu omu nsi yona rundi kubisemezaamu rundi kubisambaiga bireme kukora. Kandi tibijja n'okutaahirra ekiragiho eky'okugaba obukoonyezi omu nsi yona, rundi ebiragiho ebiri ou ihanga lyona. Kukira muno, ekiragiho kinu tikijja kukwata ha bugabe bw'omuntu kutunga obubudamo omu mahanga agandi.

- Eky'okuhabura 3

1. Gavumente z'amahanga ziina omulimo gw'amaani kulinda n'okuha obukoonyezi Abahanganguki abali omu ihanga lyabu.

2. Abahanganguki kusaba kandi bakatunga okulindwa kurungi hamu n'obukoonyezi kuruga omu bantu abarukukwatwaho. Tibaijaga kutwarwa kubi rundi kufubirwa habw'okusaba ekintu.

- Ek'okuhabura 4

1. Eby'okuhabura binu nibijaga kukozezebwa hataroho kusoroora kwona omu rangi, ihanga, rundi mukazi rundi musajja, rundi habw'orulimi, rundi enyikiriza rundi enteekereza omu by'obulemi, rundi omu kintu ekindi kyona rundi habw'okuruga aheeru y'ihanga, rundi obuzaarwa bwe, rundi orulengo rwe omu biragiro rundi enyikara ye, obukuru bwe, obulema ha mubiri, ebintu ebi aina, hali yazaaliirwe n'ebindi nk'ebi.
2. Abahanganguki abamu nk'abaana, na muno abaana abatali n'abazaire baabu, abakazi abaina enda, abakazi abakyaina abaana bato muno, abakazi abarolerra amaka bonka, abantu abaina obulema, abantu abakuzire muno, banu baheebwa obukoonyezi obubasemeriire kandi obusobora kubakoonyera omu mbeera yaabu.

**EKICWEKA II: EBIKWASIRE HA KUTANGIRA
OBUHANGANGUKI**

- Eky'okuhabura 5

Abantu boona abarukukwatwaho omu nsi yoona otiireho n'abarukujunaanizibwa amahanga goona nibaija kutamu omulimo gwabu ekitiinisa kandi barole nti n'abantu abandi nibagutamu ekitiinisa kusigikira omu kiragiyo eky'obukoonyezi ha bantu omu miringo yoona nkooku bakali nukwo basobole kutangira obuhanganguki kubaho.

- Eky'okuhabura 6

1. Buli muntu weena aina obugabe kutangirwa kuruga omu maka ge omu miringo etahikire akataaha omu buhanganguki.
2. Obuhanganguki obusemeriire kutangirwa nibwo obwija omu miringo enu:
 - a) Obu buleetwaho okusoroora omu rangi, rindi "kwita oruganda" rundi n'emikorre endi yoona ekwasire rundi erukurugirra omu kutahirra abantu habw'ihanga lyabu, ediini yaabu rundi obuzaale bwabu;
 - b) Obu habaho entaro, oihireho abantu bo bonka beetabire omu by'okwerinda rundi haroho okuhambiriza kutaaha omu mahe;
 - c) Ekiikaro hali omuntu aba naakorra ebintu ebitaina mugaso muno kandi bitarukukoonyera abantu;
 - d) Obu habaho ebigwererezi, oihireho obu kyetaagisa abantu baruge hali barukwikara nubwo babe kurungi;
 - e) Obu kyeyambisibwa nk'omulingo gw'okufubirra hamu abantu;
3. Obuhanganguki obu buraabahoga tibwijaga kuhinguza obusumi bwingi kunu ekyetaago kyabwo kihoireho.

- Eky'okuroraho 7

1. Hatakabaireho kucwamu ngu obuhanganguki bubeho, abarukukwatwaho baina kuba barozere ngu tiharoho mulingo gundi gwona ogusobora kukoonyera abantu oihireho kuhanganguka. Obu kiraabaga kitasobokere kutungayo

omulingo gundi gwona, abarukukwatwaho balengeho kukeehya obuhanganguki n'ebizibu ebiburugiramu.

2. Abantu abarukukwatwaho omu by'obuhanganguki nibateekwa kurora ngu Abahanganguki batungire ah'okuraara aharungi nkooku kirukuba nikisoboka. Baina kurora ngu abantu abo hali bahangangukiire tibabataire omu kabi, baliisiibwe kurungi, baroleeriirwe kurungi kandi nibaikara heecumi kandi abantu abarukuruga omu ka emu baikale hamu.
3. Obuhanganguki bunu obu bubaho kitali ngu bwizireho bwangu bwangu habw'obulemu, binu nibiteekwa kubanza kukorwa:
 - a) Abantu abahairwe obusobozi kujunaanizibwa eby'obuhanganguki omu ihanga nibateekwa kwikarra nibo bahanuule kukora encwamu ha ky'okukora;
 - b) Nibateekwa kukora entegeka ezirukumara kurora ngu abantu abarukugenda omu buhanganguki basoboroirwe kurungi ensonga ezirukubatwaza omu buhanganguki kandi n'oku baraagenda kandi obu kiba nikyeataagisa basasurwe rundi batwarwe hali barukugya kwikara;
 - c) Abantu abarukufururwa baina kwikiriza bonka batahambiriziibwe
 - d) Abarukukwatwaho omu kuhanganguki abantu nibateekwa kurora ngu bahanwire n'abantu abarukugenda omu buhanganguki, na muno abakazi omu kutegeka byona ebikwasire ha buhanganguki.
 - e) Obu kiraabaga kyetaagisize kukozeza ebiragiho omu kufurura abantu, abakugu omu by'ebiragiho nibaijaga kweyambisibwa omu kukora emirimo nk'egi.
 - f) Obugabe abantu kwetungira ekihikire, otiireho n'encwamu ya kooti nibijaga kutwarwa nk'ekintu kikuru.

- Eky'okuhabura 8

Kuhanganguki abantu tikwijaga kukorwa omu miringo erukutahirra obugabe bw'abantu ha bwomeezi bwabu, ekitiinisa kyabu, rundi omu kwetwara kwabu otiireho n'ebizibu ebiburugiramu.

- Eky'okuhabura 9

Gavumenti z'amahanga goona niziragirwa kutungira abantu abali omu ihanga lyabu, enzaarwa zaaho, abantu ab'oruganda ruke, abalimi b'orulengo rwa hansi abaliisa n'abandi boona abaina ebirukubateeraniza omu nsi yaabu baleme kugenda omu buhanganguki.

**EKICWEKA III: EBIKWASIRE HA KULINDA ABANTU
ABALI OMU BUHANGANGUKI**

- Eky'okuroraho 10

1. Buli muntu weena aina obugabe kwikara ali mwomeezi. Obugabe obu nibuteekwa kulindwa ebiragiro. Busaho muntu weena araagumaga naihwaho obwomeezi bwe. Abantu abali omu buhanganguki nibajjga kulindwa batangirwe kuhikwaho binu:

- a) Kuhwerekereza oruganda rwona
- b) Kwitwa kw'omuntu omu omu
- c) Kuhwerekereza abantu boona
- d) Kubuzaho abantu omu miringo etarukwetegerezebwa gamba nk'okubanyaga rundi kubabohera ahantu ahatarukwikirizibwa, kubatiinisiriza rundi kubakora ebintu ebirugirramu okufa.

Okutiinisiriza rundi kuleetaho omuntu kukora ebintu ebigambirweho eruguru nikutangwa.

2. Kutahirra Abahanganguki abataina kabi rundi abalekere kukora akabi ha bantu okabakoraho akabi tikirukwikirizibwa. Abahanganguki nibajjaga kulindwa hali binu:

- a) Kutahirirwa rundi kwenderezebwa n'emiringo endi yoona ey'okubakoraho akabi, rundi kutaho ebiikaro hali abantu ba buliijo basobora kutaahirirwa bakabonesebwa;
- b) Kubaleka omu njara batarukulya nka gumu ha miringo y'okubafubira;

- c) Kubeeyambisa nk'eky'okweserekamu ky'abamahe hali abarukubarwanisa, rundi kubakozesa omu kurwana nukwo abaamahe batahikwaho obulemu rundi kibakoonyere kusingura obulemu;
- d) Kutaahirra enkambi zaabu rundi hali barukwikara;
- e) Kukozeza obubbomu bw'omu itaka kwita abantu.

- Eky'okuhabura 11

1. Buli muntu aina obugabe kulinda ekitiinisa kye, kuba n'obusinge n'okukora ebihikire omu nyeerabya ye omu bantu.
2. Abahanganguki nibajjaga kulindwa n'obu kiraabaga kiri ngu okwetwara kwabu kukeezeziibweho. Nibajjaga kutangirwa hali binu:
 - a) Abakazi kuhambwa, kubasarasara ha mibiri, kubabonesa, kubarabya kubi n'okubaha ebifubiro ebirukuhemura, kubakora ekintu kyona ekirukuswaza enyikara yaabu, kubatwara kubi ngu habwokuba bali bakazi rundi bali basajja, kubakozesa obwamalaaya n'ebintu ebindi byona ebibonereza obwomeezi bwabu.
 - b) Kubakozesa obwiru rundi ebintu byona ebirukusisana eby'obwiru omu busumi bwa biro binu gamba nk'okubasweza bateegondiize, kubyama nabo bateegondiize, rundi kukozeza abaana bato emirimo ebakizire;
 - c) Ebikorwa ebigenderiire kubonabonesa Abahanganguki;

Kutiinisiriza rundi kuleetera abantu kukora ebigambirweho eruguru nikutangwa.

- Eky'okuhabura 12

1. Buli muntu aina obugabe kwetwara n'okuba n'obusinge. Busaho muntu arakwatwaga rundi akateebwa omu nkomo omu mulingo ogutahikire.
2. Kurora ngu obugabe bunu Abahanganguki nibabutunga, tibajjaga kutangirwa rundi kuboherwa omu nkambi batagenzere hali barukugonza. Obu kiraabaga nikyetaagisa ngu baina kwikara hamu, tikijjaga kutwara akasumi akakizire hali kiraabaga nikyetaagisa.
3. Abahanganguki nibajjaga kulindwa batakwatwa omu mulingo ogutahikire ngu habwokuba bo bali omu buhanganguki.

4. Busaho kintu kyona ekiraaleteraga Abahanganguki kutwarwa abanyagi.

- Eky'okuhabura 13

1. Busaho kintu kyona ekiraleeterezaaga abaana abato abali omu buhanganguki kwetabe rundi kusabwe kwetaba omu kurwana entaro.
2. Abahanganguki baraatangirwaga kutwarwa omu kurwana entaro rundi kuteekwa omu mahe goona ngu habwokuba bo bali Bahanganguki. Kuhambiriza Abahanganguki n'obukambwe rundi kubakora ebintu ebirukubahambiriza kutaaha amahe, rundi kubafubira ngu habwokuba bangire kutaaha amahe tikirukwikirizibwa n'akataito.

- Eky'okuhabura 14

1. Buli muhanganguki aina obugabe kwetwara n'okugenda hali arukugonza kandi akeekomera mu na hali araikara.
2. Na muno abahanganguki baina obugabe kugendagenda omu nkambi yaabu rundi aheeru yayo, rundi kugendagenda nkooku bakagondeze omu biikaro byona hali baba nibaikara.

- Eky'okuhabura 15

Abahanganguki baina:

- a) Obugabe kuserra hali baraikara kurungi omu ihanga erindi ryona;
- b) Obugabe kuruga omu ihanga lyabu;
- c) Obugabe kwikara omu ihanga erindi;
- d) Obugabe kutahambirizibwa kugarurwa hali barugire rundi kutwarwa omu biikaro ebisobora kuteeka obwomeezi bwabu omu kabi rundi hali baraaburwa obusinge.

- Eky'okuhabura 16

1. Abahanganguki baina obugabe kumanya ebikwasire ha bantu baabu rundi hali bali obu baba bababuzireho.

2. Abarukukwatwaho eby'obuhanganguki nibateekwa kuseruuliriza beetegereze hali Abahanganguki ababuzire bali kandi bakoragana n'ebitebe ebindi byona omu mahanga goona omu kukora emirimo enu. Nibateekwa kusoborra ow'oruganda weena ali haihi ebibaraabaga beetegeriirze rundi hali bahikire omu kuseruuliriza kwabu.
3. Abantu abarukukwatwaho bajjaga kusoorooza emibiri y'abantu abafiire, bagikwate kurungi etacwekacweka nukwo esobole kugarulirwa ow'oruganda ali haihi kandi eziikwe n'ekitiinisa.
4. Ebituuro by'Abahanganguki abafiire nibiteekwa kulindwa kandi biteekwemu ekitiinisa. Abahanganguki nibateekwa kuba n'obugabe bw'okuhika ha bituuro by'abantu baabu abaafiire.

- Eky'okuhabura 17

1. Buli muntu aina obugabe kutamu eka y'owaabu ekitiinisa.
2. Kurora ngu obugabe bunu nibuhikirizibwa Abahanganguki abarugire omu ka emu abaragonzaga kwikara hamu bajjaga kwikirizibwa.
3. Amaka agaraayahukanizibwaga nigateekwa kuteeranizibwa omu bwangu. Haijaga kukorwa kyona ekirukusoboka kuteeraniza amaka ago, na muno obu haraabaga harumu abaana. Abantu abarukukwatwaho basobozesege abantu b'eka emu kugarurwa omu bantu baabu hali bali kandi batemu amaani ebitebe ebiteeraniza abantu b'eka emu, bakole nabyo nukwo omulimo ogu guhikirre.
4. Abantu b'eka emu abalindiirwe hamu omu buhanganguki baija kuba n'obugabe kwikara hamu.

- Eky'okuhabura 18

1. Abantu boona abali omu buhanganguki baina obugabe kuba n'obwomeezi obuli ha mutindo ogurukumara.

2. Haakiri, ebintu n'obu biraabaga biri kubi bita, abarukukwatwaho baina kutungira binu abahanguki kandi obu hataroho n'okusoroora kwona:
 - a) Eby'okulya ebirungi n'amaizi agaahwirwe kurungi;
 - b) Ah'okuraara aharungi;
 - c) Eby'okujwara ebirungi;
 - d) Obujanjabi oburungi na hali barukwikara aheecumi.

3. Nihateekwa kukorwa kyona ekirukusoboka kurora ngu abakazi nibeetaba omu kukora entegeka n'okugabira abantu ebyetaago.

- Eky'okuhabura 19

1. Abahanguki boona abahutaaziibwe, abarwaire hamu n'abaina obulema ha mibiri nibaijaga kutunga obujanjabi oburukusoboka kandi omu bwangu muno. Tibaijaga kusoorwa omu mulingo gwona oihireho kwahukana omu ndwara yaabu. Obu kiraabaga kisobokere Abahanganguki baratungaga omuntu w'okubatererra n'okubahabura omu bwomeezi bwabu obwa buliijo.

2. Ebyetaago by'abakazi ha bwomeezi bwabu nibiteekwa kutwarwa nk'ekintu kikuru. Nibasemerra kutunga abajanjabi abarolerra obwomeezi bw'abakazi, gamba nk'abarukujunaanizibwa eby'okuzaara n'abantu b'okutererra abakazi abatungire ebizibu nk'eby'okuhambwa rundi kukozezebwa ebitahikire nukwo bagarre ebiteekerezo byabu omu nteeko.

3. Eky'okutangira abantu kukwatwa endwara ezirukurra gamba nka siriimu n'ezindi nikiteekwa kukwatwa n'amaani omu bahanguki.

- Eky'okuhabura 20

1. Buli muntu aina obugabe kutwarwa nk'omuntu omu biragiho.

2. Kurora ngu obugabe bunu nibuhika Abahanganguki, abantu abarukukwatwaho nibaija kubaha ebihandiiko ebirukubeetagisa kwegondeza omu bugabe bwabu, gamba nka paasipooti ebbaruha z'okweyanjura, kaada z'okuzaarwa n'ebbaruha z'obuswezi. Na muno abantu abarukukwatwaho nibaijaga kubagabira ebbaruha empyaka rundi kubatungira ezindi, ezikuru obu

ziraabaga zibabuzireho omu kasumi k'okugenda omu buhanganguki. Omu kubatungira ebihandiiko binu tibaijaga kubateeraho amateeka agagumire gamba nk'okubanza kugaruka omu maka hali bairukire nukwo batunge ebihandiiko binu rundi ebindi eburukwetaagwa.

3. Abakazi n'abasaija boona baija kuba n'obugabe oburukwinganaingana omu kutunga ebihandiiko binu ebihandiikirwe omu mabara gaabu bonka.

- Eky'okuhabura 21

1. Busaho muntu araihwahoga ebintu bye ebi aina.
2. Ebintu by'Abahanganguki nibijaga kulindwa kurungi bitahikirweho ebintu nka binu.
 - a) Kunyagwa;
 - b) Abantu abandi kuguma nibabisiisa;
 - c) Kukozezewa nk'eky'okweserekamu ky'abamahe omu bulemu;
 - d) Kubonabonesezaaho rundi kubiihiza abakama baabyo;
 - e) Kubisiisa rundi kubinyaga n'ekigendererwa ky'okufubira abakama baabyo
3. Ebintu eby'Abahanganguki baleka enyuma nibiteekwa kulindwa kurungi bitasiisikara, rundi bikanyagwa rundi abantu abandi bakacwamu kubiikaramu rundi kubikozesa.

- Eky'okuhabura 22

Abahanganguki obu baraabaga bali omu nkambi rundi ahantu ahandi hoona tibaijaga kusoorwa omu kukozeza obugabe bwabu bunu:

- a) Obugabe bw'okweteekereza, kuhondera enteekereza yaabu, ediini rundi enyikiriza kubaza eki barukwetaaga n'okuta ebiteekerezo byabu omu nkora;
- b) Obugabe bw'okweserurra emirimo y'okukora n'okwetaba omu bintu by'okubataahiza ensimbi;
- c) Obugabe bw'okukora ebitebe n'okwetaba omu mirimo y'ekicweka kyabu;

- d) Obugabe bw'okukoma n'okwetaba omu mirimo ya gavumenti n'ey'abantu boona, otiireho n'okutunga ebintu ebiraakoonyera kukozeza obugabe bwabu;
- e) Obugabe bw'okukozeza orulimi orubarukwetegereza kurungi.

- Eky'okuhabura 23

1. Buli muntu weena aina obugabe kusoma omu masomero.
2. Kurora ngu obugabe bunu nibuteekwa omu nkora habw'Abahanganguki, abantu abarukukwatwaho nibateekwa kurora ngu Abahanganguki na muno abaana, nibaatunga okusomesebwa okwa busa kandi okwa buli omu aina kwetabamu, ha rulengo rwa puraimare.

Omu kusoma kunu, obuhangwa bw'abaana, orulimi rwabu n'ediini nibiteekwa kuteekwamu ekitiinisa.

3. Nihateekwa kubaho entegeka z'okurora ngu abakazi n'abaana b'obwisiki nibeetaba omu kusoma omu bwijwire.
4. Eby'okukozeza omu kusomesa n'okutendeka Abahanganguki, na muno abaana enyakaimukya n'abakazi nibijaga kuleetwa omu Bahanganguki omu bwangu. Kinu nikijaga kukorwa Abahanganguki obu baraabaga bali omu nkambi rundi ahantu ahandi hoonna omu bwangu, kasita kiraabaga kisobokere.

EKICWEKA IV: EBIKWASIRE HA KUHA OBUKOONYEZI

1. Obukoonyezi bwona nibwijaga kuheebwa kusigikira omu biragiho hataroho kusoborra rundi kurora ha buso.
2. Obusobozi bw'Abahanganguki tibwijaga kuteekwa omu bintu ebindi eby'obulemi rundi eby'amahe.

- Eky'okuhabura 25

1. Abantu abajunaanizibwa muno kutungira Abahanganguki obukoonyezi nibo ab'obusobozi omu ihanga eri;
2. Ebitebe ebigaba obukoonyezi omu nsi yoona biina obugabe kuha Abahanganguki obukoonyezi. Obukoonyezi nk'obu tibwatwarwege nk'ekikorwa ky'obunyazigwa rundi ekirukutahirra ensonga z'omunda y'ihanga, nikijaga kwikirizibwa omu mutima murungi. Ihanga tiryakirizibwege kwanga ekikorwa kinu na muno muno ihanga obu liraabaga litarukusoroora rundi litarukwenda kuha Abahanganguki baakyo obukoonyezi obu.

- Eky'okuhabura 26

Abantu abakora omulimo gw'okugaba obukoonyezi, ebiiruka byabu n'ebintu byabu bijaga kulindwa kurungi kandi biteekwemu ekitiinisa.. Tibijaga kutaahirirwa rundi kunyagwa rundi kusiiswa omu mulingo gwona.

- Eky'okuhabura 27

1. Ebitebe by'ensi yoona n'abantu abandi boona abarukukwatwaho baina kwegendereza muno, kulinda obusinge n'obugabe bw'Abahanganguki kandi bakole kyona ekirukusoboka kurora ngu binu tibitaahiriirwe. Omu kukora kinu, ebitebe binu n'abantu banu baina kuhondera ebiragiho n'emikorre ey'ensi yoona.

2. Ebibaziibweho eruguru bigenderiire kwoleka obujunaanizibwa bw'ebitebe ebihairwe obusobozi kukora omulimo gunu ha kulinda Abahanganguki. Emirimo yabyo neesobora kukorwa gavumenti y'ihanga rundi ihanga nirisobora kusaba ekitebe kuha obukoonyezi obu.

**EKICWEKA V: EBIKWASIRE HA KUGARURWA OMU MAKI
KUFURUKIRA HANDI BUHYAKA HAMU N’OKWETABA
OMU BANTU BA BULIISO BUHYAKA**

Eky’okuhabura 28

1. Abarukukwatwaho baina omulimo gw’okutaho embeera n’okuha ebirukwetaagisa kusobozesa Abahanganguki kugaruka omu maka gaabu beegondiize rundi kugaruka ahantu hoona hali bakaba nibaikara, rundi kufurukira omu kicweka baina obusinge kandi n’ekitiinisa. Abarukukwatwaho baina kukoonyera abarugire omu buhanganguki baagaruka omu maka gaabu rundi baafurukira ahandi basobole kwetaba omu bantu ba buliiso.
2. Nihateekwa kukora kyona ekirusoboka kusobozesa Abahanganguki kwetaba omu kuteekaniza okugaruka kwabu, rundi okufurukira ahantu ahandi n’okwetaba omu bwomeezi bw’abantu aba buliiso.

Eky’okuhabura 29

1. Abanyakurugire omu buhanganguki baagaruka omu maka gaabu, rundi baagaruka omu biikaro hali baabaire nibaikara, rundi baafurukira omu kicweka ekindi eky’ihanga, tibaijaga kusoorwa habw’okusangwa babaire Bahanganguki. Baija kuba n’obugabe kwetaba omu mirimo ya buliiso nk’abantu abandi boona kandi babe n’obugabe oburukwingana n’obw’abandi omu kutunga emirimo.
2. Abarukukwatwaho baina omulimo n’obujunaanizibwa kukoonyera abarugire omu buhanganguki, baagaruka omu maka gaabu rundi baafurukira ahandi kugarulirwa ebintu byabu ebi baalekere enyuma rundi ebyabaihirweho obu bakaba nibagya omu buhanganguki. Obu kiba kitarukusoboka kugarulirwa ebintu byabu abarukukwatwaho baina kusobozesa abarugire omu buhanganguki kusasurwa ebintu byabu rundi bakoonyerwe omu mulingo ogundi gwona ogusemeriire.

Eky'okuhabura 30

Abantu boona abarukukwatwaho baija kusobozesa ebitebe by'ensi yoona, n'abantu abagaba obukoonyezi kuhikiriza omulimo ogubahairwe babasobozese n'okuhikirra omu Bahanganguki bwangu hataroho arukubatanga. Eki nikiija kubasobozesa kukoonyera Abahanganguki kugaruka omu maka gaabu, rundi kufurukira ahantu ahandi n'okwetaba omu bwomeezi bw'abantu ba buliijo.